

西漢會要

卷一 卷七

共七十卷八冊

127.21
345



御製題武英殿聚珍版十韻

有序

校輯永樂大典內之散簡零編並蒐訪天下遺籍不
下萬餘種彙爲四庫全書擇人所罕觀有裨世道人
心及足資考鏡者剞劂流傳嘉惠來學第種類多則
付雕非易董武英殿事金簡以活字法爲請旣不濫
費棗梨又不久淹歲月用力省而程功速至簡且捷
考昔沈括筆談記宋慶歷中有畢昇爲活版以膠泥
燒成而陸深金臺紀聞則云毘陵人初用鉛字視版
印尤巧便斯皆活版之權輿顧埏泥體麤鎔鉛質軟



俱不及鋟木之工緻茲刻單字計二十五萬餘雖數
百十種之書悉可取給而校讐之精今更有勝於古
所云者第活字版之名不雅馴因以聚珍名之而系
以詩

稽古搜四庫於今突五車開鑄思壽世積版或充閭張

帖唐院集周文梁代餘同爲製活字用以印全書精越

鵬冠體

非歲江南所進之書有鵬冠子卽活字版第字體不工且多訛謬耳

富過鄴架儲

機圓省雕氏功倍謝鈔胥聯腋事堪例擬泥法似疎毀

銅昔悔波

康熙年間編纂古今圖書集成刻銅字爲活版排印歲工貯之武英殿歷年既久銅字或

破竊缺少司事者懼于咎適值乾隆初年京師錢貴遂
請毀銅字併鑄從之所得有限而所耗甚多已爲非計
且使銅字尚存則今之印書刊本此慙予旣復羨黎棗
不更事半功倍乎深爲惜之
還教慎魯魚成編示來學嘉惠志符初

乾隆甲午仲夏

西漢會要

武英殿聚珍版

提要

臣等謹按西漢會要七十卷宋徐天麟撰天麟字

仲祥臨江人開禧元年進士調撫州教授歷武學

博士通判惠潭二州權知英德府事蹟附見宋史

徐夢莘傳稱天麟為通直郎得之之子夢莘之

從子鼂公武讀書志則稱為夢莘之子考樓鑰攻

媿集有西漢會要序曰徐思叔為左氏國記其兄

秘閣商老為北盟錄已而思叔之子孟堅著漢官



考次子仲祥又作漢會要商老夢莘之字思叔得之之字也然則史不誤而鼂氏誤矣其書仿唐會要之體取漢書所載制度典章見於紀志表傳者以類相從分門編載其無可隸者亦依蘇冕舊例以雜錄附之凡分十有五門共三百六十七事嘉定四年具表進之於朝有旨付尚書省藏之祕閣班固書最稱博瞻於一代禮樂刑政悉綜括其大端而理密文繁驟難得其體要天麟爲之區分別白經緯本末一一犁然其詮次極爲精審惟所採

祇據本史故於漢制之見於他書者概不採掇未免失之於隘又如輿服門中於司馬相如揚雄諸賦鋪張揚厲之語一概摘入殊非事實亦爲有乖義例然其實串詳洽實未有能過之者昔人稱顏師古爲漢書功臣若天麟者固亦無愧斯目矣

西漢會要目錄

宋

徐

天

麟

撰

卷一

帝系一

帝號

卷二

帝系二

太皇太后皇太后皇后

附 雜錄

卷三

帝系三

皇太子 雜錄 上附

卷四

帝系四

皇太子雜錄下

皇子 雜錄 附

卷五

帝系五

諸侯王 雜錄 附

王子侯

宗室 雜錄 附

卷六

帝系六

公主王主 雜錄 附

和蕃公主

內職 雜錄 附

出宮人

卷七

禮一 吉禮

禮

卷八

禮二 吉禮

封禪

卷九

禮三 吉禮

親郊 雜錄附

親祠后土 雜錄附

卷十

禮四 吉禮

郊議

卷十一

禮五 吉禮

祖宗配侑

總天神

山川

高禘

臘蜡

籍田親蠶 雜錄附

社稷 雜錄附

明堂

卷十二

禮六 吉禮

宗廟 雜錄附

原廟

郡國廟

卷十三

禮七 吉禮

廟議

卷十四

禮八 吉禮

廟祭

衣冠出游

禘祫

祠孔子

禱旱

雜祭祀

幣玉

牲牢

車輅

祭服

受釐

巫祝

尊寶鼎

卷十五

禮九 嘉禮

朝會

諸侯朝覲

上尊號

上壽

冊立皇子

卷十六

禮十 嘉禮

行幸

卷十七

禮十一 嘉禮

詔令章奏 附雜錄

冠禮

婚禮

鄉射

賜酺

賜姓氏 更姓氏附

禁踰侈

卷十八

禮十二 賓禮

封先代後 先賢後附

先代冢墓

禮十三 軍禮

親征

勞軍

田獵

兵祭

卷十九

禮十四 凶禮

山陵 附雜錄

寢園 附雜錄

卷二十

禮十五 凶禮

服制

喪葬 附 雜錄

恤死事

卷二十一

樂

樂舞 附 雜錄

卷二十二

樂

樂章

角抵

卷二十三

輿服 上

天子車旗 皇后太子附

先驅 旄

奉車

參乘

警趨

廋馬 附 雜錄

百官車 附 雜錄

卷二十四

輿服 下

天子冠服 皇后太子附

百官冠服 附 雜錄

臣庶衣服

璽

羣臣璽綬

符節

關傳

卷二十五

學校 上

太學

辟廱

郡國學

圖書 上

卷二十六

學校 下

圖書 下求遺書附

講論經義 校讎附

卷二十七

黜百家

賜書 諸侯王求書附

卷二十八

運歷 上

五運 正朔服色附

歷

改元

卷二十九

運歷 下

天文

權量

時令

卷二十九

祥瑞上

符瑞

日月變異

星隕

雪

總天變

卷三十

時令

日食

星孛

亡冰

霜雹

山崩

石立

火災

蝗螟

時令

鳥獸之妖

雜變異

草木之妖

人妖

占驗

地震

石鳴

隕石

旱

祥異下

地震

山崩

石立

火災

蝗螟

鳥獸之妖

雜變異

草木之妖

人妖

占驗

卷三十一

職官一

上公 四輔師友附

太師

太傅

太保

四輔

師友

三公

丞相

太尉

御史大夫

九卿 列卿附

太常 博士

光祿勳 大夫郎謁者期門羽林僕射

衛尉

太僕

廷尉

大鴻臚

宗正

大司農

少府 以上九卿

執金吾

軍將作大匠

典屬國

水衡都尉

卷三十三

職官二

嬭宮官

卷三十三 詹事

長信詹事

大長秋

太子太傅少傅

軍官

大將軍

票騎將軍

史記作票騎

車騎將軍

衛將軍

前後左右將軍

列將軍

別將并莫府附

護軍都尉

司隸校尉

城門校尉

八校尉

卷三十三

職官三

三輔

京兆尹

左馮翊

右扶風

郡國

諸侯王國

異姓諸侯王

部刺史

郡守

郡掾

都尉

郡國均輸鹽鐵官

列郡別置官

縣令長

掾史

卷三十四

職官四

封建

封功臣

封外戚

封丞相

遣列侯就國

繼絕世

王四夷君長

侯降虜

封方士

婦人爵邑

封建雜錄

卷三十五

職官五

加官

爵

舊爵

封君

賜重封

雜武功爵

賜爵

卷三

卷三十六

職官六

特進

領尚書事

平尚書事

領他官

兼官

行

守

假

宿衛

待詔

上計

卷三十七

職官七

秩祿

增秩

益吏祿

班序

蠻夷叙位

卷三十八

職官八

使外國

行水災流民

舉賢觀風

舉冤獄

雜遣使

奉使矯制

卷三十九

職官九

奉使矯制下

矯節偽節附

考課

官稱

卷四十八

職官十

集議上

卷四十一

職官十一

集議下

卷四十二

職官十二

告寧休沐

奉朝請朝明望

久任

恩賜

致仕

圖功臣

卷四十三

職官十三

改官名

省官

戒救官吏

戒貪吏

策免大臣

卷四十四

選舉

賢良方正 茂材異等附

博士弟子

試學童

射策

明經

明法

治劇

異科

聘召名士

卷四十五

選舉 下

舉廉 孝廉附

孝弟力田

任子

納貲

鬻官

方伎

郡吏

上書

從軍

選舉雜錄

卷四十六

民政一

戶口

風俗

卷四十七

民政二

傳籍

更役

鄉役

泛役

若小孫並
雜錄附

復除

卷四十八

民政三

置三老

賜帛
附

尊高年

賜帛
附

卷四十九

恤流民

賜孝弟力田錢帛

賜爵
附

恤鰥寡孤獨

民政四

徙豪族

奴婢

雜錄
附

治豪猾

卷五十

食貨一

墾田數

限民名田

代田

假民公田

省苑

勸農桑

卷五十一

食貨二

水利

附雜錄

田租

賜民租賦

算賦

口賦

更賦

戶賦

軍賦

卷五十二

食貨三

算嘗

算車船

算緡錢

租六畜

雜稅

給獻費

以粟當賦

募民入粟

權酤

鹽鐵

卷五十三

食貨四

錢幣

附雜錄

錢禁

西漢會要
白金皮幣

卷五十四

食貨五

大司農錢

都內
錢附

少府禁錢

水衡錢

均輸平準

漕運

倉庾

常平倉

卷五十五

食貨六

荒政

振貸

振
附
振
採

釋逋貸

卷五十六

兵一

南北軍

衛將軍軍

車騎將軍屯兵

右將軍屯兵

期門羽林

衛士

中尉兵

城門兵

司隸校尉

七校

伏飛射士

輯濯士

胡越騎

羌騎

材官

輕車

騎士

樓船

屬國騎

屯田卒

卷五十七

兵二

教閱

絲戍

調發

羽檄
虎符

選募

勇敢奔命
伉健募士

發謫徒

七科謫惡少
年亡命弛刑

行伍部校

壁壘

京師兵器

郡國兵器

附雜錄

卷五十八

兵三

兵占

軍功

軍法

卷五十九

兵四

屯田 附 雜錄

馬政 附 雜錄

備邊 附 雜錄

卷六十

兵五

處降

捕盜

卷六十一

刑法一

刑制

律令

卷六十二

刑法二

疑讞

議貴

矜老弱

贖罪

恤刑

女刑

卷六十三

刑法三

大赦

赦徒

別赦

赦宥雜錄

獄

斷獄數

卷六十四

方域一

都邑

郡國沿革

廢郡

卷六十五

方域二

論形勢

官

殿

室
廬堂

館

闕

卷六十六

方域三

宮苑雜錄

街市

鄉里

關

城塞

傳置

臺觀

樓閣

苑囿

池籓

道路

諸門
附 城門

宮寺

亭障

斥候

邸

卷六十七

方域四

黃河

卷六十八

蕃夷上

匈奴

卷六十九

蕃夷中

西南夷

閩粵

卷七十

蕃夷下

西域

南粵

朝鮮



急为 P21

西漢會要卷一



宋 徐 天 麟 撰

帝系一

帝號

豐公太上皇父也春秋晉史蔡墨有言陶唐氏既衰其
 後有劉累學擾龍事孔甲范氏其後也而大夫范宣子
 亦曰祖自虞以上為陶唐氏在夏為御龍氏在商為豕
 韋氏在周為唐杜氏晉主夏盟為范氏范氏為晉士師
 魯文公世奔秦後歸于晉其處者為劉氏劉向云戰國

時劉氏自秦獲於魏秦滅魏遷大梁都于豐故周市說
雍齒曰豐故梁徙也是以頌高祖云漢帝本系出自唐
帝降及于周在秦作劉涉魏而東遂爲豐公豐公蓋太
上皇父其遷日淺墳墓在豐鮮焉及高祖卽位置祠祀
官則有秦晉梁荆之巫世祠天地綴之以祀豈不信哉
由是推之漢承堯運德祚已盛斷蛇著符旗幟尚赤協
于火德自然之應得天統矣本紀贊

太上皇高帝父太公也漢六年夏五月詔曰人之至親
莫親於父子故父有天下傳歸於子子有天下尊歸於

父此人道之極也前日天下大亂兵革並起萬民苦殃
朕親被堅執銳自帥士卒犯危難平暴亂立諸侯偃兵
息民天下大安此皆太公之教訓也諸王通侯將軍羣
卿大夫已尊朕爲皇帝而太公未有號今上尊太公曰
太上皇十年秋七月太上皇崩葬萬年本紀

太祖高皇帝諱邦之字字季沛豐邑中陽里人姓劉氏

母媪後追尊高祖爲人隆準而龍顏美須髯左股有七

十二黑子寬仁愛人意豁如也及壯試吏爲泗上亭長
秦二世元年立爲沛公漢元年立爲漢王五年二月甲

午即皇帝位于汜水之陽十二年夏四月甲辰帝崩于

長樂宮五月丙寅葬長陵羣臣曰帝起細微撥亂世反

之正平定天下為漢太祖功最高上尊號曰高皇帝皆紀

十二年壽 諡法無高以功高特起名

丞相相國蕭何

太尉盧縮周勃

御史大夫周苛周昌趙堯

孝惠皇帝諱盈之字高祖太子也 母曰呂 帝年五歲高

祖初為漢王二年立為太子五年為皇太子十二年四

月高祖崩五月丙寅即皇帝位明年改元七年秋八月

戊寅帝崩于未央宮九月辛丑葬安陵著紀七年壽二十四 諡

柔質慈民曰惠

相國蕭何曹參

右丞相王陵

左丞相陳平

太尉周勃

御史大夫趙堯

高皇后呂氏諱雉之字曰野雞 父單父人呂公好相人見高

祖狀貌因重敬之呂公曰臣少好相人相人多矣無如季相願季自愛臣有息女願為箕帚妾呂媪怒呂公曰公始常欲竒此女與貴人沛令善公求之不與何自妄許與劉季呂公曰此非兒女子所知卒與高祖生孝惠帝魯元公主高帝五年尊王后曰皇后惠帝即位尊為皇太后太后立帝姊魯元公主女為皇后無子取後宮美人子名之以為太子惠帝崩太子立為皇帝年幼太后臨朝稱制四年少帝自知非皇后子出怨言皇太后幽之永巷五月丙辰立常山王宏為皇帝八年七月辛

巳皇太后崩于未央宮既誅諸呂大臣相與陰謀以為少帝父三弟為王者皆非孝惠子復共誅之著紀八年

太傅

王陵審食其

右丞相

陳平

左丞相

審食其

御史大夫

任敖曹窋張蒼

太宗孝文皇帝諱恒

之字曰常

高祖中子也

母曰薄姬

高祖十一

年立為代王十七年秋高后崩

張晏曰代王張敖也

大臣迎代

王入代邸羣臣從至上議曰丞相陳平等再拜言大王

足下子宏等皆非孝惠皇帝子不當奉宗廟大王高皇
 帝子宜為嗣願大王即天子位代王西鄉遜者三南鄉
 遜者再丞相平等奉天子璽符再拜上代王遂即天子
 位後七年夏六月己亥帝崩于未央宮乙巳葬霸陵著紀
 二十三年孝景元年申屠嘉等奏德莫盛於孝文皇帝
 壽四十六年
 宜為帝者太宗之廟制曰可 諡慈惠愛 民曰文

改元 前八年 中八年 後七年

丞相 陳平 周勃 灌嬰 張蒼 申屠嘉

太尉 灌嬰

御史大夫 張蒼 馮敬 申屠嘉 陶青

孝景皇帝諱啓 之字 文帝太子也 母曰竇 皇后 文帝元年正

月立為皇太子後七年六月文帝崩丁未即皇帝位後
 三年正月甲子帝崩于未央宮二月癸酉葬陽陵著紀 十六

年壽四 十八 諡布義行 剛曰景

改元 前七年 中六年 後三年

丞相 申屠嘉 陶青 周亞夫 劉舍 衛綰

太尉 周亞夫

御史大夫 陶青 鼂錯 介 劉舍 衛綰 直不疑

世宗孝武皇帝諱徹之字曰通景帝中子也母曰王美人年四歲

立為膠東王七歲為皇太子十六歲後三年正月景帝

崩甲子太子即皇帝位後元二年二月丁卯帝崩于五

柞宮三月甲申葬茂陵著紀五十四年壽七十一孝宣本始二年詔

尊孝武廟為世宗廟威彊獻諡德曰武

年號建元六年元光六年元朔六年元狩六年元鼎六年元封六年太初四年天漢四年太始四年征和

四年後元二年

丞相寶嬰許昌田蚡薛澤公孫宏李蔡嚴青翟趙周石慶公孫賀劉屈氂田千秋

太尉田蚡

大司馬衛青霍去病霍光

御史大夫牛抵趙綰嚴青翟韓安國張歐公孫宏番係李蔡張湯石慶卜式兒寬延廣王卿杜周暴

勝之商邱成桑宏羊

孝昭皇帝諱弗陵後止諱弗之字曰不武帝少子也母曰趙婕妤武帝

後元二年二月立為皇太子年八歲以侍中奉車都尉

霍光為大司馬大將軍受遺詔輔少主明日武帝崩戊

辰太子即皇帝位元鳳四年帝加元服元平元年夏四

月癸未帝崩于未央宮六月壬申葬平陵著紀十三年壽一十一

諡聖聞周達曰昭

年號始元六年元鳳六年元平一年

丞相田千秋王 楊敞蔡義

大司馬霍光

御史大夫桑宏羊王訢楊敞蔡義田廣明

中宗孝宣皇帝諱詢之字武帝曾孫戾太子孫也太子

納史良娣生史皇孫皇孫納王夫人生宣帝號曰皇曾

孫生數月遭巫蠱事太子良娣皇孫王夫人皆遇害曾

孫雖在襁褓猶坐收繫郡邸獄丙吉為廷尉監曾孫賴

吉得全因遭大赦有詔掖庭養視上屬籍宗正元平元

年四月昭帝崩無嗣大將軍霍光請皇后召昌邑王六

月王受皇帝璽綬癸巳光奏王賀淫亂請廢太后詔曰

可光奏議曰孝武帝曾孫病已潛邸名也操行節儉慈仁愛

人可以嗣孝昭皇帝後奏可宗正德至曾孫尚冠里舍

洗沐賜御府衣太僕以軫獵車奉迎曾孫庚申入未央

宮見皇太后封為陽武侯已而羣臣奉上璽綬即皇帝

位元康元年詔更諱詢黃龍元年冬十二月甲戌帝崩

于未央宮著紀二十五初元元年正月辛丑葬杜陵平

帝元始四年尊孝宣廟為中宗聖善周諡開曰宜

年號 本始四年地節四年元康四年神爵四年五鳳四年甘露四年黃龍一年

丞相 蔡義韋賢魏相丙吉黃霸于定國

大司馬 霍光張安世霍禹韓增許延壽史高

御史大夫 田廣明魏相丙吉蕭望之黃霸杜延年于定國陳萬年

高宗孝元皇帝諱爽 之字宣帝太子也 母曰恭哀許皇后 宣帝

微時生民間年二歲宣帝即位八歲立為太子黃龍元

年十二月宣帝崩癸巳太子即皇帝位竟寧元年夏五

月壬辰帝崩于未央宮秋七月丙戌葬渭陵 著紀十六年壽四十六

三平帝元始四年尊為高宗廟 諡行義悅民曰元

年號 初元五年永光五年建昭五年竟寧一年

丞相 于定國韋元成匡衡

大司馬 史高王接許嘉王鳳

御史大夫 陳萬年貢禹薛廣德韋元成鄭宏匡衡李延壽張譚

孝成皇帝諱驚 之字元帝太子也 母曰王皇后 元帝在太子

宮生甲觀畫堂為世嫡皇孫宣帝愛之字曰太孫年三

歲而宣帝崩元年即位帝為太子竟寧元年五月元帝

崩六月己未太子即皇帝位綏和二年三月丙戌帝崩

于未央宮四月己卯葬延陵 著紀二十六 諡 安民立政曰成

年號建始四年河平四年陽朔四年鴻嘉四年永始四年元延四年綏和二年

丞相匡衡王商張禹薛宣翟方進孔光

大司馬許嘉王鳳王音王商王根王莽師丹

御史大夫張譚尹忠張忠王音子永薛宣王駿翟方進孔光何武

大司空何武師丹

孝哀皇帝諱欣之字元帝庶孫定陶恭王子也母曰年

三歲嗣立為王綏和元年立為皇太子綏和二年三月

成帝崩四月丙午太子即皇帝位元壽二年六月戊午

帝崩于未央宮秋九月壬寅葬義陵著紀六年諡恭仁

短折日哀

年號建平四年元壽二年

太傅孔尤

丞相孔光朱博平當王嘉

大司徒馬官

大司馬傅喜丁明傅晏韋賞董賢王莽

大司空朱博彭宣王崇

御史大夫趙元朱博平當王嘉王崇賈延孔光何武彭宣

孝平皇帝諱衍之字元帝庶孫中山孝王子也母曰年衛姬

三歲嗣立為王元壽二年六月哀帝崩太皇太后遣車
 騎將軍王舜大鴻臚左咸使持節迎中山王九月辛酉
 中山王即皇帝位帝年九歲太皇太后臨朝大司馬莽
 秉政百官總已以聽於莽元始二年更名平帝本名箕子今更名衍
 告祠高廟五年十二月丙午帝崩于未央宮漢注云帝春秋益壯
 以母衛太后故恐不悅莽自知益疎篡弑春秋益壯
 之謀由是生因到臘日置藥酒中弑帝 有司議曰禮

臣不殤君阜帝年十有四歲宜以禮斂加元服奏可葬

康陵著紀五年壽十有四 諡布網治紀曰平

年號元始五年

太師孔光

太傅王莽

太保王舜

大司徒馬宮 平晏

大司空王崇 甄豐

西漢會要卷二

宋 徐 天 麟 撰

帝系二

太皇太后皇太后皇后 雜錄附

漢興因秦之稱號帝母稱皇太后祖母稱太皇太后適

稱皇后妾皆稱夫人 外戚傳

昭靈后高祖母媼也嘗息大澤之陂夢與神遇是時雷

電晦冥太公往視則見交龍於上已而有娠遂產高祖

高祖即位追尊母媼為昭靈夫人 漢儀注云高祖母兵起時死小黄北後葬

於小黃呂后七年尊曰昭靈后以本紀修

高祖呂皇后見帝號

高祖薄姬生文帝年八歲立為代王出從子之代為代

太后文帝即位尊太后為皇太后孝景即位尊為太皇

太后前二年崩葬南陵以外戚傳及本紀修下同

孝惠張皇后宣平侯敖尚帝姊魯元公主有女惠帝即

位呂太后欲為重親以公主女配帝為皇后呂太后崩

廢處北宮孝文後元年薨葬安陵不起墳

孝文竇皇后景帝母也呂太后時以良家子選入宮太

后出宮人以賜諸王各五人誤置籍代伍中代王獨幸

竇姬生景帝文帝立數月公卿請立太子而竇姬男最

長立為太子竇姬為皇后景帝即位尊為皇太后建元

六年崩合葬霸陵

孝景薄皇后孝文薄太后家女也景帝為太子時薄太

后取以為太子妃景帝立立薄妃為皇后無子立六年

薄太后崩皇后廢廢後四年薨葬長安城東平望亭南

孝景王皇后武帝母也嫁為金王孫婦生一女矣母臧

兒十筮曰兩女當貴欲倚兩女奪金氏納太子宮生三

女一男男方在身時王夫人夢日入其懷以告太子太子曰此貴兆也未生而文帝崩景帝即位王夫人生男會薄皇后廢立王夫人為皇后立九年景帝崩武帝即位為皇太后元朔三年崩合葬陽陵

孝武陳皇后長公主嫖女也嫖寶太后女也初武帝得立為太

子長主有力取主女為妃及帝即位立為皇后元光五

年賜皇后策曰皇后失序惑於巫祝不可以承天命其

上璽綬罷退居長門宮後數年薨葬霸陵郎官亭東

孝武衛皇后字子夫為平陽主謳者武帝被霸上還過

平陽主既飲謳者進帝獨說子夫主因奏送入宮元朔

元年生男據遂立為皇后皇后立七年而男立為太子

衛后立三十八年巫蠱事起皇后自殺宣帝立乃改葬

諡曰思后置園邑三百家長丞周衛奉守焉

孝武趙婕妤昭帝母也武帝巡狩過河間望氣者言此

有奇女天子亟使使召之既至女兩手皆拳上自披之

手即時伸由是得幸號曰拳夫人進為婕妤居鈞弋宮

大有寵生昭帝號鈞弋子任身十四月乃生上曰聞昔

堯十四月而生今鈞弋亦然迺命其所生門曰堯母門

健仔從幸甘泉有過見譴以憂死因葬雲陽後上疾病乃立鈞弋子爲皇太子明日帝崩昭帝卽位追尊健仔爲皇太后發卒二萬人起雲陵邑

孝昭上官皇后祖父桀受武帝遺詔輔少主昭帝初立年八歲桀子安有女卽霍光外孫因帝姊鄂邑蓋長公主內安女後宮爲健仔月餘遂立爲皇后年甫六歲後桀安謀廢立事發覺宗族旣滅皇后以年少不與謀亦光外孫故得不廢皇后立十歲而昭帝崩后年十四五云昌邑王卽位尊爲皇太后宣帝卽位爲太皇太后凡

立四十七年年五十二建昭二年崩合葬平陵

宣帝祖母戾后本衛太子史良娣也巫蠱事起遇害宣帝卽位追尊曰戾后

宣帝母悼后本史皇孫王夫人也名翁須生宣帝數月衛太子敗家人皆坐誅宣帝卽位追尊母王夫人謚曰悼后與祖母戾后皆改葬起園邑長丞奉守

孝宣許皇后元帝母也父廣漢坐論爲鬼薪時宣帝養於掖庭號皇曾孫與廣漢同寺居廣漢有女平君年十四五當爲歐侯氏子婦臨當入歐侯氏子死遂與曾孫

一歲生元帝數月曾孫立爲帝平君爲婕妤公卿議立
皇后大臣白立許婕妤霍光夫人顯欲貴其小女道無
從明年許皇后當娠顯使女醫淳于衍以附子并合大
醫大丸飲皇后有頃曰我頭岑岑也藥中得無有毒遂
崩謚曰恭哀皇后葬杜南是爲杜陵南園

孝宣霍皇后大司馬大將軍博陸侯光女也母顯既使
淳于衍陰殺許后顯勸光納之果立爲皇后立三歲而
光薨上立許后男爲太子顯恚不食歐血復教皇后令
毒太子皇后數召太子賜食保阿輒先嘗之后挾毒不

得行後殺許后事頗泄顯與諸婿兄弟謀反發覺皆誅
滅后廢處昭臺宮後十一歲徙雲林館乃自殺葬昆吾
亭東

孝宣王皇后父奉光宣帝在民間數與奉光會有女十
餘歲每當適人所當適輒死宣帝卽位召入後宮爲婕
妤霍皇后廢後上憐許太子蚤失母於是選後宮素謹
慎而無子者遂立王婕妤爲皇后令母養太子自爲后
後希見無寵封父奉光爲邛成侯立十六年宣帝崩元
帝卽位爲皇太后成帝卽位爲太皇太后成帝母亦姓

王故世號太皇太后爲邛成太后凡立四十九年年七十餘永始元年崩合葬杜陵稱東園

孝元王皇后成帝母王莽之姑也五鳳中獻入掖庭宣帝選送太子宮生成帝字太孫宣帝崩太子卽位是爲元帝立太孫爲太子以母王妃爲婕妤後三日立爲皇后元帝崩太子立是爲成帝尊皇后爲皇太后哀帝卽位爲太皇太后哀帝崩無子太皇太后以莽爲大司馬共立中山王是爲平帝平帝年九歲常年被疾太后臨朝委政於莽莽踐祚居攝太后力不能禁及莽卽位更

命太皇太后爲新室文母年八十四建國五年崩合葬渭陵

孝元傅皇后哀帝祖母也少爲上官太后才人自元帝爲太子得進幸元帝卽位立爲婕妤生定陶恭王更號昭儀元帝崩傅昭儀隨王歸國稱定陶太后恭王薨子代爲王王母曰丁姬太后躬自養視成帝無繼嗣遂立定陶王爲太子哀帝卽位尊定陶恭王爲恭皇帝傅太后爲恭皇太后歲餘尊爲帝太太后丁姬爲帝太后後又更帝太太后爲皇太太后稱永信宮帝太后稱中安

宮而成帝母太皇太后本稱長信宮成帝趙后爲皇太后並四太后各置少府太僕元壽元年崩合葬渭陵稱孝元傳皇后云

孝成許皇后大司馬車騎將軍平恩侯嘉女也元帝悼傷母恭哀后居位日淺而遭霍氏之辜故選嘉女以配皇太子成帝卽位立爲皇后是時大將軍鳳用事威權尤盛其後比三年日蝕言事者頗歸咎於鳳矣而谷永等遂著之許氏后姊爲媚道祝詛事發覺許后坐廢處昭臺宮後九年賜藥自殺

孝成趙皇后本長安宮人號曰飛燕成帝召入宮大幸有女弟復召入俱爲婕妤許后廢乃立婕妤爲皇后弟爲昭儀姊弟顛寵十餘年卒皆無子成帝崩民間歸罪趙昭儀皇太后詔治問皇帝起居發病狀昭儀自殺哀帝旣立尊趙皇后爲皇太后哀帝崩王莽白太后貶皇太后爲孝成皇后徙居北宮後月餘廢爲庶人是日自殺

哀帝母丁太后定陶恭王姬也哀帝卽位尊定陶恭王爲恭皇帝丁姬爲恭皇后後又更爲帝太后建平二年

丁太后崩上令起陵恭皇之園哀帝崩王莽秉政使有司舉奏丁傅罪惡貶傅太后號爲定陶共王母丁太后號曰丁姬又奏發共王母及丁姬冢取其璽綬莽又周棘其處以爲世戒云
孝哀傅皇后定陶太后從弟子也哀帝爲定陶王時傅太后欲重親取以配王王入爲漢太子傅氏女爲妃哀帝卽位爲皇后帝崩王莽白太皇太后廢爲庶人自殺孝平王皇后安漢公莽女也平帝卽位年九歲成帝母太皇太后稱制而莽秉政欲依霍光故事以女配帝太后不得已而許之明年遣大司徒官等奉乘輿法駕迎皇后於安漢公第后立歲餘平帝崩莽立子嬰尊皇后爲皇太后莽卽真以嬰爲定安公改皇太后爲定安公太后太后時年十八矣漢兵誅莽自投火中而死

雜錄

皇太后皇后公主所食曰邑

百官表

成帝卽位匡衡上疏曰匹配之際生民之始萬福之原婚姻之禮正然後品物遂而天命全孔子論詩以關雎爲始言太上者民之父母后夫人之行不侔乎天地則

西漢會要 卷二
無以奉神靈之統而理萬物之宜故詩曰窈窕淑女君子好逑言能致其貞淑不貳其操情欲之感無介乎容儀宴私之意不形乎動靜夫然後可以配至尊而爲宗廟主此綱紀之首王教之端也自上世以來三代興廢未有不由此者也願陛下詳覽得失盛衰之効以定大基采有德戒聲色近嚴敬遠技能匡衡傳自上爲太子時以好色聞及卽位皇太后詔采良家女杜欽因是說大將軍鳳曰禮壹娶九女所以極陽數廣嗣重祖也必鄉舉求窈窕不問華色所以助德理內也

弟姪雖缺不復補所以養壽塞爭也故后妃有貞淑之行則繼嗣有賢聖之君制度有威儀之節則人君有壽考之福廢而不由則女德不厭女德不厭則壽命不究於高年書云或四三年言佚欲之生害也男子五十好色未衰婦人四十容貌改前以改前之容侍於未衰之年而不以禮爲制則其原不可救而後俅異態後俅異態則正后自疑而支庶有閒適之心是以晉獻被納讒之謗申生蒙無罪之辜今聖主富於春秋未有適嗣方鄉術入學未親后妃之議將軍輔政宜因始初之隆建

西漢會要 卷二
九女之制詳擇有行義之家求淑女之質母必有聲色
音技能爲萬世大法夫少戒之在色小弁之作可爲寒
心唯將軍常以爲憂鳳白之太后太后以爲故事無有
欽復重言詩云殷監不遠在夏后氏之世刺戒者至迫
近而省聽者常怠忽可不慎哉前言九女略陳其禍福
甚可悼懼竊恐將軍不深留意后妃之制天壽治亂存
亡之端也迹三代之季世覽宗宣之饗國察近屬之符
驗禍敗曷常不由女德是以珮玉晏鳴關雎歎之知好
色之伐性短年離制度之生無厭天下將蒙化陵夷而

成俗也故詠淑女幾以配上忠孝之篤仁厚之作也夫
君親壽尊國家治安誠臣子之至願所當勉之也易曰
正其本萬物理凡事論有疑未可立行者求之往古則
典刑無考之來今則吉凶同卒搖易之則民心惑若是
者誠難施也今九女之制合於往古無害於今不逆於
民心至易行也行之至有福也將軍輔政而不蚤定非
天下之所望也唯將軍信臣子之願念關雎之思逮委
政之隆及始初清明爲漢家建無窮之基誠難以忽不
可以遴鳳不能自立法度循故事而已

杜欽傳

河平元年夏四月己亥晦日有食之詔公卿百僚陳過失無有所諱光祿大夫劉向對曰四月交於五月月同孝惠日同孝昭其占恐害繼嗣是時許皇后專寵後宮希得進見中外皆憂上無繼嗣故杜欽谷永及向所對皆及之上於是減省椒房掖庭用度服御輿駕所發諸宮官府及所造作遺賜外家羣臣妾皆如竟寧以前故事皇后上疏自陳以爲時世異制長短相補不出漢制而已纖微之間未必可同若竟寧前與黃龍前豈相放哉家吏不曉今壹受詔如此且使妾搖手不得設妾欲

作某屏風張於某所曰故事無有或不能得則必繩妾以詔書矣此誠不可行唯陛下省察故事以特牛祠大父母戴侯敬侯皆得蒙恩以太牢祠今當率如故事唯陛下哀之今吏甫受詔讀記直豫言使后知之非可復若私府有所取也其萌芽所以約制妾者恐失人理唯陛下深察焉上於是采谷永劉向所言災異咎驗皆在後宮之意以報之且曰吏拘於灋亦安足過蓋矯枉者過直古今同之且財幣之省特牛之祠其於皇后所以扶助德美爲華寵也咎根不除災變相襲祖宗且不血

食何戴侯也傳不云虜以約失之者鮮審皇后欲從其奢與朕亦當灋孝武皇帝也如此則甘泉建章可復興矣孝文皇帝朕之師也皇太后皇后成灋也假使太后在彼時不如職今見親厚又惡可以踰虜皇后其刻心秉德謙約爲右垂則列妾使有灋焉外戚傳永始元年帝欲立趙婕妤爲皇后先下詔封婕妤父臨爲列侯劉輔上書言臣聞天之所與必先賜以符瑞天之所違必先降以災變此神明之徵應自然之占驗也昔武王周公承順天地以饗魚鳥之瑞然猶君臣祇懼

動色相戒况於季世不蒙繼嗣之福屢受威怒之異者虜雖夙夜自責改過易行畏天命念祖業妙選有德之世考卜窈窕之女以承宗廟順神祇心塞天下望子孫之祥猶恐晚暮今迺觸情縱欲傾於卑賤之女欲以母天下不畏于天不媿于人惑莫大焉里語曰腐木不可以爲柱卑人不可以爲主天人之所不予必有禍而無福市道皆共知之朝廷莫肯壹言臣竊傷心自念得以同姓拔擢尸祿不忠污辱諫爭之官不敢不盡死唯陛下深察書奏上使侍御史收縛輔繫掖庭秘獄劉輔傳

初哀帝卽位成帝母稱太皇太后成帝趙皇后稱皇太后而上祖母傅太后與母丁后皆在國邸自以定陶共王爲稱高昌侯董宏上書言秦莊襄王母本夏氏而爲華陽夫人所子及卽位後俱稱太后宜立定陶共王后爲皇太后事下有司時師丹以左將軍與大司馬王莽共劾奏宏知皇太后至尊之號天下一統而稱引亡秦以爲比喻詿誤聖朝非所宜言大不道上新立謙讓納用莽丹言免宏爲庶人傅太后大怒要上欲必稱尊號上於是追尊定陶共王爲共皇帝尊傅太后爲共皇太后

后丁后爲共皇后郎中令冷褒黃門郎段猶等復奏言定陶共皇太后共皇后皆不宜復引定陶藩國之名以冠大號車馬衣服宜皆稱皇之意置吏二千石以下各共厥職又宜爲共皇立廟京師上復下其議有司皆以爲宜如褒猶言丹議獨曰聖王制禮取法於天地故尊卑之禮明則人倫之序正人倫之序正則乾坤得其位而陰陽順其節人主與萬民俱蒙祐福尊卑者所以正天地之位不可亂也今定陶共皇太后共皇后以定陶共爲號者母從子妻從夫之義也欲立官置吏車服與

太皇太后並非所以明尊卑亡一上之義也定陶共皇

號謚已前定義不得復改師丹傳

三宮王嘉傳貢獻三宮師古曰三宮天子太后皇后也

兩宮五行志兩宮親屬師古曰謂太后家王氏皇后家趙氏故云親屬

東宮劉向傳依東宮之尊師古曰東宮太后所居也

中宮哀紀食邑如中宮師古曰中宮皇后之宮

東朝灌夫傳東朝廷辨之如淳曰東朝太后朝也

永信宮中安宮長信宮哀紀傳昭儀皇太太后稱永信宮帝太后稱中安宮成帝母太

皇太后稱長信宮

椒房車千秋傳未央椒房師古曰椒房殿名皇后所居也以椒和泥塗壁取其温而芳也

青蒲史丹傳應劭曰青蒲非皇后不得至此

西漢會要卷三

帝系三

宋 徐 天 麟 撰

皇太子 雜錄 上附

漢二年六月立太子赦罪人 高紀

五年漢王即皇帝位太子曰皇太子 高紀

惠帝即位太后立帝姊魯元公主女為皇后無子取後

宮美人子名之以為太子 高后紀

孝文元年正月有司請蚤建太子所以尊宗廟也詔曰

朕既不德上帝神明未歆饗也天下人民未有愜志今縱不能博求天下賢聖有德之人而嬗天下焉而曰豫建太子是重吾不德也謂天下何其安之有司曰豫建太子所以重宗廟社稷不忘天下也上曰楚王季父也春秋高閱天下之義理多矣明於國家之體吳王於朕兄也淮南王弟也皆秉德以陪朕豈爲不豫哉諸侯王宗室昆弟有功臣多賢及有德義者若舉有德以陪朕之不能終是社稷之靈天下之福也今不選舉焉而曰必子人其以朕爲忘賢有德者而專於子非所以憂天

下也朕甚不取有司固請曰古者殷周有國治安皆且千歲有天下者莫長焉用此道也立嗣必子所從來遠矣高帝始平天下建諸侯爲帝者太祖諸侯王列侯始受國者亦皆爲其國祖子孫繼嗣世世不絕天下之大義也故高帝設之以撫海內今釋宜建而更選於諸侯宗室非高帝之志也更議不宜子啓最長敦厚慈仁請建以爲太子上乃許之因賜天下民當爲父後者爵一

級

本紀

孝景四年立皇子榮爲皇太子

本紀

七年正月廢皇太子榮為臨江王四月丁巳立皇子徹

為皇太子賜民為父後者爵一級本紀

孝武元狩元年夏四月丁卯立皇太子賜中二千石爵

右庶長民為父後者爵一級本紀

征和二年七月按道侯韓說使者江充等掘蠱太子宮

壬午太子與皇后謀斬充呂節發兵與丞相劉屈氂大

戰長安死者數萬人庚寅太子亡皇后自殺八月辛亥

太子自殺于湖本紀

武帝末戾太子敗燕王旦廣陵王胥行驕嫚後元二年

二月上疾病遂立昭帝為太子年八歲明日武帝崩太

子即皇帝位昭紀

孝宣地節三年立皇太子大赦天下賜御史大夫爵關

內侯中二千石爵右庶長天下當為父後者爵一級本紀

五鳳元年正月皇太子冠皇太后賜丞相將軍列侯中

二千石帛人百匹太夫人八十四匹夫人六十匹又賜列

侯嗣子爵五大夫男子為父後者爵一級本紀

孝成皇帝元帝太子也母曰王皇后元帝在太子宫生

甲觀畫堂為世嫡皇孫宣帝愛之字曰太孫常置左右

年三歲而宣帝崩元帝卽位帝爲太子壯好經書寬博
謹慎初居桂宮上嘗急召太子出龍樓門不敢絕馳道
西至直城門得絕乃度還入作室門上遲之問其故以
狀對上大說乃著令令太子得絕馳道云其後幸酒樂
燕樂上不以爲能而定陶恭王有材藝母傅昭儀又愛
幸上以故常有意欲以恭王爲嗣賴侍中史丹護太子
家輔助有力上亦以先帝尤愛太子故得無廢竟寧元
年五月元帝崩六月己未太子卽皇帝位

成帝綏和元年二月癸丑詔曰朕承太祖鴻業奉宗廟

二十五年德不能綏理宇內百姓怨望者衆不蒙天祐
至今未有繼嗣天下無所係心觀于往古近事之戒禍
亂之萌皆由斯焉定陶王欣於朕爲子慈仁孝順可以
承天序繼祭祀其立欣爲皇太子封中山王舅諫大夫
馮參爲宜鄉侯益中山國三萬戶以慰其意賜諸侯王
列侯金天下當爲父後者爵三老孝弟力田帛各有差

以上
成紀

孝哀皇帝元帝庶孫定陶恭王子也母曰丁姬年三歲
嗣立爲王長好文辭法律元延四年入朝盡從傅相中

尉時成帝少弟中山孝王亦來朝獨從傅上怪之以問定陶王對曰令諸侯王朝得從其國二千石傅相中尉皆國二千石故盡從之上令誦詩通習能說他日問中山王獨從傅在何法令不能對令誦尚書又廢及賜食於前後飽起下鞵係解成帝由此以爲不能而賢定陶王數稱其材時王祖母傅太后隨王來朝私賂遺上所幸趙昭儀及帝舅驃騎將軍曲陽侯王根昭儀及根見上亡子亦欲豫自結爲長久計皆更稱定陶王勸帝以爲嗣成帝亦自美其材爲加元服而遣之時年十七矣

明年使執金吾任宏守大鴻臚持節召定陶王立爲皇太子謝曰臣幸得繼父守藩爲諸侯王材質不足以假充太子之宮陛下聖德寬仁敬承祖宗奉順神祇宜蒙福祐子孫千億之報臣願且得留國邸旦夕奉問起居俟有聖嗣歸國守藩書奏天子報聞後月餘立楚孝王孫景爲定陶王奉恭王祀所以獎厲太子專爲後之誼

紀哀

雜錄上

高帝欲廢太子立戚夫人子趙王如意大臣多爭未能

得堅決也呂后恐不知所為或謂呂后曰留侯善畫計
上信用之呂后乃使建成侯呂澤劫良曰君常為上謀
臣今上曰欲易太子君安得高枕而卧良曰始上數在
急困之中幸用臣策今天下安定以愛欲易太子骨肉
之間雖臣等百人何益呂澤彊要曰為我畫計良曰此
難以口舌爭也顧上有所不能致者四人四人年老矣
皆以上媢媻士故逃匿山中義不為漢臣然上高此四
人今公誠能毋愛金玉璧帛令太子為書卑辭安車因
使辯士固請宜來來以為客時從入朝令上見之則一

助也於是呂后令呂澤使人奉太子書卑辭厚禮迎此
四人四人至客建成侯所漢十一年黥布反上疾欲使
太子往擊之四人相謂曰凡來者將以存太子太子將
兵事危矣乃說建成侯曰太子將兵有功即位不益無
功則從此受禍且太子所與俱諸將皆與上定天下梟
將也今迺使太子將之此無異使羊將狼皆不肯為用
其無功必矣臣聞母愛者子抱今戚夫人日夜侍御趙
王常居前上終不使不肖子居愛子上明其代太子位
必矣君何不急請呂后承間為上泣言黥布天下猛將

善用兵今諸將皆陛下故等夷迺令太子將此屬莫肯
爲用且布聞之鼓行而西耳上雖疾彊載輜車臥而護
之諸將不敢不盡力上雖苦彊爲妻子計於是呂澤夜
見呂后呂后承間爲上泣而言如四人意上曰君惟之
孺子固不足遣迺公自行耳於是上自將而東羣臣居
守皆送至霸上良疾彊起至曲郵見上曰臣宜從疾甚
楚人剽疾願上慎毋與楚爭鋒因說上令太子爲將軍
監關中兵上謂子房雖疾彊臥傳太子是時叔孫通已
爲太傅良行少傅事漢十二年上從破布歸疾益甚愈

欲易太子良諫不聽因疾不視事叔孫太傅稱說引古
以死爭太子上陽許之猶欲易之及宴置酒太子侍四
人者從太子年皆八十有餘鬚眉皓白衣冠甚偉上怪
問曰何爲者四人前對各言其姓名上迺驚曰吾求公
避逃我今公何自從吾兒游乎四人曰陛下輕士善罵
臣等義不辱故恐而亡匿今聞太子仁孝恭敬愛士天
下莫不延頸願爲太子死者故臣等來上曰煩公幸卒
調護太子四人爲壽已畢趨去上目送之召戚夫人指
視曰我欲易之彼四人爲之輔羽翼已成難動矣呂氏

真迺主矣張良傳

叔孫通為太子太傅高帝欲以趙王如意易太子通諫曰昔者晉獻公以驪姬故廢太子立奚齊晉國亂者數十年為天下笑秦以不早定扶蘇胡亥詐立自使滅祀此陛下所親見今太子仁孝天下皆聞之呂后與陛下攻苦食啖師古曰當作淡其可背哉陛下必欲廢適而立少臣願先伏誅以頸血汙地高帝曰公罷矣吾特戲耳通曰太子天下本本壹搖天下震動奈何以天下戲高帝曰吾聽公及上道酒見留侯以招客從太子入見上遂無

易太子志矣叔孫通傳

高帝欲廢太子而立戚姬子如意為太子大臣固爭莫能得上以留侯策止而周昌庭爭之彊上問其說昌為人吃又盛怒曰臣口不能言然臣期期知其不可陛下欲廢太子臣期期不奉詔上欣然而笑即罷呂后側耳於東箱聽見昌為跪謝曰微君太子幾廢周昌傳孝文時鼂錯為太子舍人門大夫遷博士上書言人主所以尊顯功名揚於萬世之後者以知術數也故人主知所以臨制臣下而治其眾則羣臣畏服矣知所以聽

言受事則不欺蔽矣知所以安利萬民則海內必從矣知所以忠孝事上則臣子之行備矣此四者臣竊爲皇太子急之人臣之議或曰皇太子亡以知事爲也臣之愚誠以爲不然竊觀上世之君不能奉其宗廟而刦殺於其臣者皆不知術數者也皇太子所讀書多矣而未深知術數者不問書說也夫多誦而不知其說所謂勞苦而不爲功臣竊觀皇太子材智高奇馭射伎藝過人絕遠然於術數未有所守者以陛下爲心也竊願陛下幸擇聖人之術可用今世者以賜皇太子因時使太子

陳明於前唯陛下裁察上善之於是拜錯爲太子家令

以其辯得幸太子太子家號曰智囊

鼂錯傳

文帝時賈誼上書曰古之王者太子迺生固舉以禮使士負之有司齊肅端冕見之南郊見于天也過闕則下過廟則趨孝子之道也故自爲赤子而教固已行矣昔者成王幼在襁抱之中召公爲太保周公爲太傅太公爲太師保保其身體傅傅之惠義師道之教訓此三公之職也於是爲置三少皆上大夫也曰少保少傅少師是與太子宴者也故迺孩提有識三公三少固明孝仁

禮義以道習之逐去邪人不使見惡行於是皆選天下之端士孝悌博聞有道術者以衛翼之使與太子居處出入故太子迺生而見正事聞正言行正道左右前後皆正人也夫習與正人居之不能毋正猶生長於齊不能不齊言也習與不正人居之不能毋不正猶生長於楚之地不能不楚言也故擇其所者必先受業迺得嘗之擇其所樂必先有習迺得爲之孔子曰少成若天性習貫如自然及太子少長知妃色則入于學學者所學之官也及太子既冠成人免於保傅之嚴則有記過之

史徹膳之宰進善之旌誹謗之木敢諫之鼓瞽史誦詩工誦箴諫大夫進謀士傳民語習與智長故切而不媿化與心成故中道若性三代之禮春朝朝日秋暮夕月所以明有敬也春秋入學坐國老執醬而親餽之所以明有孝也行以鸞和步中采齊趣中肆夏所以明有度也其於禽獸見其生不食其死聞其聲不食其肉故遠庖廚所以長恩且明有仁也夫三代之所以長久者以其輔翼太子有此具也天下之命縣於太子太子之善在於早諭教與選左右夫心未濫而先諭教則化易成

也開於道術智誼之指則教之力也若其服習積貫則左右而已臣故曰選左右早諭教最急夫教得而左右正則太子正矣太子正而天下定矣賈誼傳太子與梁王共車入朝不下司馬門張釋之追止太子梁王毋入殿門遂劾不下公門不敬奏之薄太后聞之文帝免冠謝曰教兒子不謹薄太后使使承詔赦太子梁王然後得入文帝繇是奇釋之張釋之傳

西漢會要卷四

宋 徐 天 麟 撰
帝系四

皇太子雜錄下

孝景前三年梁孝王入朝是時上未置太子與梁王言曰千秋萬歲後傳於王王辭謝雖知非至言然心內喜明年漢立太子前七年上廢栗太子太后心欲以梁王為嗣大臣及爰盎等有所關說於帝太后議格孝王不敢復言太后以嗣事文三王傳

景帝弟梁孝王母竇太后愛之孝王朝因燕昆弟飲是時上未立太子酒酣上從容曰千秋萬歲後傳王太后驩竇嬰引卮酒進上曰天下者高祖天下父子相傳漢之約也上何以得傳梁王太后由此憎嬰嬰亦薄其官

竇嬰傳

武帝春秋二十九迺得皇子枚臯與東方朔作皇太子生賦及立皇太子祿祝受詔所爲皆不從故事重皇子

也枚乘傳

孝武皇帝六男衛皇后生戾太子據元狩元年立爲皇

太子年七歲矣初上年二十九乃得太子甚喜爲立祿使東方朔枚臯作祿祝少壯詔受公羊春秋又從瑕邱江公受穀梁及冠就宮上爲立博望苑使通賓客從其所好故多以異端進者武帝末衛后寵衰江充用事充與太子及衛氏有隙恐上晏駕後爲太子所誅會巫蠱事起充因此爲姦是時上春秋高意多所惡以爲左右皆爲蠱道祝詛窮治其事丞相公孫賀父子陽石諸邑公主及皇后弟子長平侯衛伉皆坐誅充典治巫蠱既知上意自言宮中有蠱氣入宮至省中壞御座掘地上

使按道侯韓說御史章籟黃門蘇文等助充充遂至太子宮掘盡得桐木人時上疾辟暑甘泉宮獨皇后太子在太子召問少傅石德德懼爲師傅并誅因謂太子曰前丞相父子兩公主及衛氏皆坐此今巫與使者掘地得徵驗不知巫置之邪將實有也無以自明可矯以節收補充等繫獄窮治其姦詐且上疾在甘泉皇后及家吏請問皆不報上存亡未可知而姦臣如此太子將不念秦扶蘇事邪太子急然德言征和二年七月壬午乃使客爲使者收補充等按道侯說疑使者有詐不肯受

詔客格殺說御史章籟被創突亡自歸甘泉太子使舍人無且持節夜入未央宮殿長秋門因長御倚華具白皇后發中殿車載射士出武庫兵發長樂宮衛告令百官曰江充反迺斬充以徇炙胡巫上林中遂部賓客爲將率與丞相劉屈氂等戰長安中擾亂言太子反以故衆不附太子兵敗亡不得上怒甚羣下憂懼不知所出壺關三老茂上書曰臣聞父者猶天母者猶地子猶萬物也故天平地安陰陽和調物迺成父慈母愛室家之中子迺孝順陰陽不和則萬物夭傷父子不和則室

西漢會要 卷四
家喪亡故又不父則子不子君不君則臣不臣雖有粟
吾豈得而食諸昔者虞舜孝之至也而不申於瞽叟孝
已被謗伯奇放流骨肉至親父子相疑何者積毀之所
生也由是觀之子無不孝而父有不察今皇太子爲漢
適嗣承萬世之業體祖宗之重親則皇帝之宗子也江
充布衣之人閭閻之隸臣耳陛下顯而用之銜至尊之
命以迫楚皇太子造飾姦詐羣邪錯謬是以親戚之路
鬲塞而不通太子進則不得上見退則困於亂臣獨冤
結而亡告不忍忿忿之心起而殺堯恐懼逋逃子盜父

兵以救難自免耳臣竊以爲無邪心詩曰營營青蠅止
于藩愷悌君子無信讒言讒言罔極交亂四國往者江
充讒殺趙太子天下莫不聞其罪固宜陛下不省察深
過太子發盛怒舉大兵而求之三公自將智者不敢言
辨士不敢說臣竊痛之臣聞子胥盡忠而忘其號比干
盡仁而遺其身忠臣竭誠不顧鈇鉞之誅以陳其愚志
在匡君安社稷也詩云取彼讒人投畀豺虎唯陛下寬
心慰意少察所親母患太子之非亟罷甲兵無令太子
久亡臣不勝惓惓出一旦之命待罪建章闕下書奏天

子感寤太子之亡也東至湖藏匿泉鳩里主人家貧常
賣屨以給太子太子有故人在湖聞其富贍使人呼之
而發覺吏圍捕太子太子自度不得脫卽入室距戶自
經山陽男子張富昌爲卒足蹋開戶新安令史李壽趨
抱解太子主人公遂格鬪死皇孫二人皆并遇害上旣
傷太子乃下詔曰蓋行疑賞所以申信也其封李壽爲
邗侯張富昌爲題侯久之巫蠱事多不信上知太子惶
恐無他意而車千秋復訟太子寃上遂擢千秋爲丞相
而族滅江充家焚蘇文於橫橋上及泉鳩里加兵刃於

太子者初爲北地太守後族上憐太子無辜乃作思子

宮爲歸來望思之臺於湖天下聞而悲之

展太子傳

宣帝地節三年立皇太子選丙吉爲太傅疏廣爲少傅
數月吉遷御史大夫廣徙爲大傅廣兄子受字公子亦
以賢良舉爲太子家令受好禮恭謹敏而有辭宣帝幸
太子宫受迎謁應對及置酒宴奉觴上壽辭禮閑雅上
甚謹說頃之拜受爲少傅太子外祖父特進平恩侯許
伯以爲太子少白使其弟中郎將舜監護太子家上以
問廣廣對曰太子國儲副君師友必於天下英俊不宜

獨親外家許氏且太子自有太傅少傅官屬已備今復使舜護太子家視陋非所以廣太子德於天下也上善其言以語丞相魏相相免冠謝曰此非臣等所能及廣繇是見器重數受賞賜太子每朝因淮見太傅在前少傅在後父子並為師傅朝廷以為榮疏廣傳

太子既壯大柔仁好儒見宣帝所用多文法吏以刑名繩下大臣楊惲蓋寬饒等坐刺譏辭語為罪而誅嘗侍燕從容言陛下持刑太深宜用儒生宣帝作色曰漢家自有制度本以霸王道雜之奈何純任德教用周政乎

且俗儒不達時宜好是古非今使人眩於名寔不知所守何足委任迺歎曰亂我家者太子也繇是疏太子而愛淮陽王曰淮陽王明察好法宜為吾子而王母張婕妤尤幸上有意欲用淮陽王代太子然以少依許氏俱從微起故終不背焉元紀

張婕妤有寵於宣帝霍皇后廢後上欲立張婕妤為后久之懲艾霍氏欲害皇太子迺更選後宮無子而謹重者迺立長陵王婕妤為后令母養太子后無寵希御見唯婕妤最幸子淮陽憲王壯大好經書法律聰達有材

帝甚愛之太子寬仁喜儒術上嗟歎憲王曰真我子也
常有意欲立張婕妤與憲王然用太子起於微細上少
依倚許氏及卽位而許后以殺死太子蚤失母故弗忍
也久之上以韋元成遜侯兄經明行高稱於朝廷迺召
拜元成爲淮陽中尉欲感諭憲王輔以推遜之臣由是
太子遂安

淮陽憲王傳

元帝卽位史丹爲駙馬都尉侍中出常驂乘甚有寵上
以丹舊臣皇考外屬親信之詔丹護太子家是時傅昭
儀子定陶共王有才藝子母俱愛幸而太子頗有酒色

之失母王皇后無寵建昭之間元帝被疾不親政事留
好音樂或置鞀鼓殿下天子自臨軒檻上墮銅丸以擲
鼓聲中嚴鼓之節後宮及左右習知音者莫能爲而定
陶王亦能之上數稱其材丹進曰凡所謂材者敏而好
學溫故知新皇太子是也若迺器人於絲竹鼓鞀之間
則是陳惠李微高於匡衡可相國也於是上嘿然而笑
其後中山哀王薨太子前弔哀王者帝之少弟與太子
游學相長大上望見太子感念哀王悲不能自止太子
旣至前不哀上大恨曰安有人不慈仁而可奉宗廟爲

民父母者乎上以責謂丹丹免冠謝上曰臣誠見陛下
哀痛中山王至以感損向者太子當進見臣竊戒屬母
涕泣感傷陛下罪迺在臣當死上以爲然意迺解丹之
輔相皆此類也竟寧元年上寢疾傅昭儀及定陶王常
在左右而皇太子希得進見上疾稍侵意忽忽不平數
問尚書以景帝時立膠東王故事是時太子長舅陽平
侯王鳳爲衛尉侍中與皇太子皆憂不知所出丹以親
密臣得侍視疾候上間獨寢時丹直入卧內頓首伏青
蒲上涕泣言曰皇太子以適長立積十餘年名號繫於

百姓天下莫不歸心臣子見定陶王雅素愛幸今者道
路流言爲國生意以爲太子有動搖之議審若此公卿
以下必以死爭不奉詔臣願先賜死以示羣臣天子素
仁不忍見丹涕泣言又切至上意大感喟然太息曰吾
日困劣而太子兩王幼少意中戀戀亦何不念乎然無
有此議且皇后謹慎先帝又愛太子吾豈可違指駙馬
都尉安所受此語丹卽却頓首曰愚臣妄聞罪當死上
因納謂丹曰吾病寢加恐不能自還善輔道太子毋違
我意丹噓唏而起太子由是遂爲嗣矣

史丹傳

西漢會要 卷四
綏和中上卽位二十五年無繼嗣至親有同產弟中山孝王及同產弟子定陶王在定陶王好學多材於帝子行而王祖母傳太后陰爲王求漢嗣私事趙皇后昭儀及帝舅大司馬驃騎將軍王根故皆勸上上召丞相翟方進御史大夫孔光右將軍廉褒後將軍朱博皆引入禁中議中山定陶王誰可爲嗣者方進根以爲定陶王帝弟之子禮曰昆弟之子猶子也爲其後者爲之子也定陶王宜爲嗣褒博皆如方進根議孔光獨以爲禮立嗣以親中山王先帝之子帝親弟也以尚書盤庚殷之

及王爲比中山王宜爲嗣上以禮兄弟不相入廟又皇后昭儀欲立定陶王故遂立爲太子光以議不中意左

遷廷尉

孔光傳

皇子

附雜錄

太上皇四男高祖兄伯蚤卒追封武哀侯高后七年追封武哀王次兄仲名喜初封宜信侯漢六年立爲代王匈奴攻代仲棄國自歸天子不忍致法廢爲合陽侯楚

元王交高祖同父少弟也自有傳

本紀及吳王濞傳

高皇帝八男呂后生孝惠帝曹夫人生齊悼惠王肥薄

西漢會要 卷四
姬生孝文帝戚夫人生趙隱王如意趙姬生淮南厲王
長諸姬生趙幽王友趙共王恢燕靈王建高五王傳

孝文皇帝四男竇皇后生孝景帝梁孝王武諸姬生代
孝王參梁懷王揖文三王傳

孝景皇帝十四男王皇后生孝武皇帝栗姬生臨江閔
王榮河間獻王德臨江哀王闕程姬生魯共王餘江都

易王非膠西于王端賈夫人生趙敬肅王彭祖中山靖
王勝唐姬生長沙定王發王夫人生廣川惠王越膠東

康王寄清河哀王乘常山憲王舜景十三王傳

孝武皇帝六男衛皇后生戾太子趙婕妤生孝昭帝王

夫人生齊懷王閔李姬生燕刺王旦廣陵厲王胥李夫

人生昌邑哀王髡武五王傳

孝宣皇帝五男許皇后生孝元帝張婕妤生淮陽憲王

欽衛婕妤生楚孝王躡公孫婕妤生東平思王宇戎婕

妤生中山哀王竟宣元六王傳

孝元皇帝三男王皇后生孝成帝傅昭儀生定陶共王

康馮昭儀生中山孝王興宣元六王傳

皇子雜錄

五宗司馬遷傳作五宗世家師古曰景帝子凡十三人為王而母五人所生遷謂同母者為一宗故云五宗也

西漢會要卷五

宋 徐 天 麟 撰

帝系五

諸侯王附 雜錄

漢興之初海內新定同姓寡少懲戒亡秦孤立之敗於是剖裂疆土立二等之爵功臣侯者百餘邑尊王子弟大啓九國自鴈門以東盡遼陽為燕代常山以南太行左轉度河濟漸於海為齊趙穀泗以往奄有龜蒙為梁楚東帶江湖薄會稽為荆吳北界淮瀕略廬衡為淮南

波漢之陽亘九嶷爲長沙諸侯比境圉匝三垂外接胡越天子自有三河東郡潁川南陽自江陵以西至巴蜀北自雲中至隴西與京師內史凡十五郡公主列侯頗邑其中而藩國大者夸州兼郡連城數十官室百官同制京師可謂橋在過其正矣雖然高祖創業日不暇給孝惠享國又淺高后女主攝位而海內晏如亡狂狡之憂卒折諸呂之難成太宗之業者亦賴之於諸侯也然諸侯原本以大末流濫以致溢小者淫荒越法大者睽孤橫逆以害身喪國故文帝采賈生之議分齊趙景帝

用鼂錯之計削吳楚武帝施主父之冊下推恩之令使諸侯王得分戶邑以封子弟不行黜陟而藩國自析自此以來齊分爲七趙分爲六梁分爲五淮南分爲三皇子始立者大國不過十餘城長沙燕代雖有舊名皆亡南北邊矣景遭七國之難抑損諸侯減黜其官武有衡山淮南之謀作左官之律設附益之法諸侯惟得衣食租稅不與政事至於哀平之際皆繼體苗裔親屬踈遠生於帷牆之中不爲士民所尊執與富室亡異而本朝短世國統三絕是故王莽知漢中外殫微本末俱弱亡

所忌憚生其姦心因母后之權假伊周之稱顓作威福
廟堂之上不降階序而運天下作謀既成遂據南面之
尊分遣五威之吏馳傳天下班行符命漢諸侯王厥角
齧首奉上璽鞞惟恐在後或迺稱美頌德以求容媚豈
不哀哉

諸侯
王表

文帝時制度疏濶諸侯王僭擬地過古制淮南濟北王
皆為逆誅誼上疏曰高皇帝以明聖威武卽天子位割
膏腴之地以王諸公多者百餘城少者三四十縣惠至
渥也然其後十年之間反者九起諸王雖名為臣實皆

有布衣昆弟之心慮亡不帝制而天子自為者擅爵人
赦死辜甚者或戴黃屋漢法令非行也欲天下治安莫
若衆建諸侯而少其力力少則易使以義國小則亡邪
心令海內之勢如身之使臂臂之使指莫不制從諸侯
之君不敢有異心輻輳並進而歸命天子雖在細民且
知其安故天下咸知陛下之明割地定制令齊趙楚各
為若干國使悼惠王幽王元王之子孫畢以次各受祖
之分地地盡而止及燕梁它國皆然其分地衆而子孫
少者建以為國空而置之須其子孫生者與仲君之諸

侯之地其削頗入漢者爲徙其侯國及封其子孫也所以數償之徐天麟按也字合作他傳寫之誤也所字合屬上句一寸之地一人之衆天子亡所利焉誠以定治而已故天下咸知陛下之廉地制壹定宗室子孫莫慮不王下無倍畔之心上無誅伐之志故天下咸知陛下之仁法立而不犯令行而不逆貫高利幾之謀不生柴奇開章之計不萌細民鄉善大臣致順故天下咸知陛下之義臥赤子天下之上而安植遺腹朝委裘而天下不亂當時大治後世誦聖壹動而五業附陛下誰憚而久不爲此賈誼傳

諸侯王雜錄

諸侯王金璽繫綬掌治其國百官表

高帝王子弟地犬牙相制所謂盤石之宗也文紀

悼惠之王齊最爲大國以海內初定子弟少激秦孤立

亡藩輔故大封同姓以填天下時諸侯得自除御史大夫

羣卿以下衆官如漢朝漢獨爲置丞相自吳楚誅後

稍奪諸侯權左官附益阿黨之法設其後諸侯唯得衣

食租稅貧者或乘牛車高五王贊

高皇帝規土連城布王子孫是以支葉扶疏異姓不得

間也

燕刺王傳

景帝卽位鼂錯爲御史大夫請諸侯之罪削其支郡諸侯謹譁吳楚七國反以誅錯爲名丞相劾奏錯當要斬錯已死謁者僕射鄧公見上曰鼂錯患諸侯疆大不可制故請削之以尊京師萬世之利也計畫始行卒受大戮臣竊爲陛下不取也於是景帝喟然長息曰公言善

吾亦恨之

鼂錯傳

景帝中五年令諸侯王不得復治國天子爲置吏

百官表

武帝初卽位大臣懲吳楚七國行事議者多寃鼂錯之

策皆以諸侯連城數十秦強欲稍侵削數奏暴其過惡諸侯王自以骨肉至親先帝所以廣封連城犬牙相錯者爲盤石宗也今或無罪爲臣下所侵辱有司吹毛求疵笞服其臣使證其君多自以侵寃建元三年代王登長沙王發中山王勝濟川王明以來朝天子置酒勝聞樂聲而泣問其故勝對曰臣聞悲者不可爲絛歎思者不可爲歎息故高漸離擊筑易水之上荆軻爲之低而不食雍門子壹微吟孟嘗君爲之於邑今臣心結日久每聞幼眇之聲不知涕泣之橫集也夫衆煦漂山聚蠱

成蠹朋黨執虎十夫撓椎是以文王拘於牖里孔子厄於陳蔡此乃烝庶之成風曾積之生害也臣身遠與寡莫爲之先衆口鑠金積毀銷骨叢輕折軸羽翮飛肉紛驚逢羅潛然出涕臣聞白日曠光幽隱皆照明月曜夜蟲蝨宵見然雲蒸列布杳冥晝昏塵埃拊覆味不見泰山何則物有蔽之也今臣雍闕不得聞讒言之徒蠹生道遼路遠曾莫爲臣聞臣竊自悲也臣聞社稷不灌屋鼠不熏何則所託者然也臣雖薄也得蒙肺腑位雖卑也得爲東藩屬又稱兄今羣臣非有葭莖之親鴻毛之

重羣居黨議朋友相爲使夫宗室擯卻骨肉冰釋斯伯奇所以流離比干所以橫分也詩云我心憂傷惄焉如擣假寐永歎唯憂用老心之憂矣疾如疾首臣之謂也具以吏所侵聞於是上乃厚諸侯之禮省有司所奏諸侯事加親親之恩焉其後更用主父偃謀令諸侯以私恩自裂地分其子弟而漢爲定制封號輒別屬漢郡漢有厚恩而諸侯地稍自分析弱小云

中山靖王傳

元狩六年四月乙巳廟立皇子闔爲齊王曰爲燕王胥爲廣陵王初作誥

武紀

王子侯

主父偃說武帝曰古者諸侯地不過百里疆弱之形易制今諸侯或連城數十地方千里緩則驕奢易爲淫亂急則阻其疆而合從以逆京師今以法割削則逆節萌起前日鼂錯是也今諸侯子弟或十數而適嗣代立餘雖骨肉無尺地之封則仁孝之道不宣願陛下令諸侯得推恩分子弟以地侯之彼人人喜得所願上以德施實分其國必稍自銷弱矣於是上從其計

主父偃傳

武帝元朔二年春正月詔曰梁王城陽王親慈同生願

曰邑分弟其許之諸侯王請與子弟邑者朕將親覽使有列位於是藩國始分而子弟畢侯矣

本紀

大哉聖祖之建業也後嗣承序以廣親親至於孝武以諸侯王疆土過制或替差失軌而子弟爲匹夫輕重不相準於是制詔御史諸侯王或欲推私恩分子弟邑者令各條上朕且臨定其號名自是支庶畢侯矣

王子侯表上

孝元之世亡王子侯者盛衰終始豈非命哉元始之際王莽擅朝僞褒宗室侯及王之孫焉居攝而愈多非其正故弗錄旋踵亦絕悲夫

王子侯表下

西漢會要 卷三
孝平元始元年封宣帝耳孫信等三十六人皆爲列侯

本紀

宗室 附 雜錄

高祖七年置宗正官以序九族 本紀又百官表云影正出屬籍

孝惠內修親親 本贊

文帝詔曰諸侯王宗室昆弟功臣多賢及有德者 本紀

四年復諸劉有屬籍家無所與 本紀

孝景三年楚元王子藝等與濞等爲逆朕不忍加法除

其籍毋令汙宗室 本紀

孝武元光元年復七國宗室前絕屬者 本紀

後元二年正月朝諸侯王于甘泉宮賜宗室 本紀

武帝時劉辟疆以宗室子隨二千石論議冠諸宗室清靜少欲常以書自娛不肯仕昭帝卽位或說大將軍霍

光曰將軍不見諸呂之事乎處伊尹周公之位攝政擅權而背宗室不與共職是以天下不信卒至於滅亡今

將軍當盛位帝春秋富宜納宗室又多與大臣共事反諸呂道如是則可以免患光然之迺擇宗室可用者辟

疆子德待詔丞相府 楚元王傳

西漢書卷五
孝昭始元二年以宗室毋在位者舉茂材劉辟彊劉長
樂皆爲光祿大夫辟彊守長樂衛尉

本紀

元鳳二年四月上自建章宮徙未央宮賜宗室子錢人
二十萬

本紀

四年正月丁亥帝加元服賜列侯宗室金帛牛酒各有

差

本紀

孝宣地節元年六月詔曰蓋聞堯親九族以和萬國朕
蒙遺德奉承聖業惟念宗室屬未盡而以罪絕若有賢
材改行勸善其復屬使得自新

本紀

地節四年劉德以宗正關內侯行謹重爲宗室率封陽

城侯

志澤侯表

成帝時劉向上封事言王氏一姓朱輪華轂者二十三
人大將軍秉事用權五侯驕奢排擯宗室孤弱公族其
有智能者尤非毀而不進遠絕宗室之任不令得給事
制省悉其與已分權事勢不兩大王氏與劉氏且不並
立宜發明詔吐德音接近宗室親而納信黜遠外戚毋
授以政所以褒睦外內之姓子子孫孫無疆之計也

劉傳

建始二年罷博望苑以賜宗室朝請者

紀本

哀帝即位賜宗室王子有屬者馬各一駟

紀本

平帝元始元年詔宗室屬未盡而以罪絕者復其屬其

為吏舉廉佐史補四百石

本紀師古曰宗室為吏者皆令舉廉各從本秩而依廉吏

遷之為佐史者

例補四百石

四年二月賜宗室有屬籍者爵自五大夫以上各有差

紀本

五年正月祫祭明堂宗室子九百人召助祭禮畢皆益

戶賜爵及金帛增秩補吏各有差詔曰蓋聞帝王以德

撫民其次親親以相及也昔堯睦九族舜惇叙之朕以

皇帝幼年且統國政惟宗室子皆太祖高皇帝子孫及

兄弟吳頃楚元之後漢元至今十有餘萬人雖有王侯

之屬莫能相糾或陷入刑罪教訓不至之咎也傳不云

虐君子篤於親則民興於仁其為宗室自太上皇以來

族親各以世氏郡國置宗師以糾之致教訓焉二十石

選有德義者以為宗師考察不從教令有寃失職者宗

師得因郵亭書言宗伯請以聞常以歲正月賜宗師帛

各十匹

紀本

宗室雜錄

高皇帝規土連城布王子孫是以支葉扶疏異姓不得

間也燕刺王傳

大雅卓爾不羣河間獻王近之景十三王贊

劉德召見甘泉宮武帝謂之千里駒本傳

肺腑中山靖王勝傳又劉向傳

同姓末屬劉向傳

宗室遺老同上

河間王良宗室儀表本傳

宗英叙傳

元狩五年沈猷侯歲坐為宗正聽請不具宗室耐為司

寇王子侯表

Table with vertical lines, mostly blank with some faint bleed-through from the reverse side.

西漢會要卷六

宋 徐 天 麟 撰

帝系六

公主王主 附 雜錄

公主 高紀如淳曰公羊傳曰天子嫁女於諸侯必使諸侯同姓者主之故謂之公主帝姊妹曰長公主諸王女曰翁主師古曰如說得之天子不親主婚故謂之公主諸王即自主婚故其女曰翁主翁者父也

太上皇女

昭哀后 高帝姊初封宣夫人呂后七年尊曰昭哀后

高祖一女

魯元公主

宣平侯張敖尚之孝惠時齊悼惠王尊為魯元太后

文帝二女

館陶長公主

竇后生女嫖文帝即位為館陶長公主師古曰年最長故謂長公主堂邑侯陳

今尚之見外戚傳

公主

周勃子勝之尙之見周勃傳

景帝三女

平陽公主

王皇后長女本陽信長公主也為平陽侯曹壽所尚故稱平陽公主曹壽有惡疾上

酒詔衛青尚平陽公主見衛青及霍去病傳

南宮公主

王皇后次女

隆慮公主

王皇后少女並見王皇后傳

武帝五女

鄂邑蓋長公主

昭帝姊燕刺王傳張晏曰食邑鄂蓋侯王信妻也師古曰為蓋侯妻是也

非王信信者武帝之舅不取鄂邑主為妻當是信子頃侯充耳

夷安公主

隆慮公主子昭平君尚見東方朔傳

衛長公主

外戚傳云子夫生三女長主衛太子姊也帝以妻樂大見郊祀志

諸邑公主

五行志征和二年巫蠱事與帝女諸邑公主陽石公主皆下獄死

陽石公主

見上又武紀注云二公主皆衛皇后女

宣帝二女

館陶公主

華健仔女名施子定國子于永尚之

敬武公主

張臨尚臨死元帝令薛宣尚後王莽白太后賜藥死見宣傳

元帝三女

平都公主

傅昭儀女

平陽公主

衛婕妤女見中山衛姬傳

潁邑公主

杜業尚

王主

成紀建始元年張晏曰王主王之女也師古曰王主則翁主也王自主婚故曰王主

公主雜錄

諸公主家令門尉皆屬宗正

百官表

主傳

東方朔傳昭平君醉殺主傳師古曰傅姆也

中府

東方朔傳館陶公主中府師古曰中府掌金帛之藏

孝惠二年十月齊悼惠王來朝獻城陽郡呂益魯元公

主邑尊公主為太后

本紀

江充出逢館陶長公主行馳道中充呵問之公主曰有太后詔充曰獨公主得行車騎皆不得盡効没入官

江充傳

衛青父鄭季以縣史給事侯家平陽侯曹壽尚武帝姊陽信長公主季與主家僮衛媼通生青青既尊貴而平

陽侯曹壽有惡疾就國長公主問列侯誰賢者左右皆言大將軍主笑曰此出吾家常騎從我奈何左右曰於今尊貴無比於是公主風白皇后皇后言之迺詔青尙

平陽公主

衛青霍去病傳

王吉曰漢家列侯尙公主諸侯則國人承翁主使男事

女夫詘於婦逆陰陽之位故多女亂

王吉傳

夏侯嬰曾孫頗尙平陽公主主隨外家姓號孫公主故

勝公子孫更為孫氏

夏侯嬰傳

博成侯張建坐尙陽邑公主與婢姦主旁數醉罵主免

昭宣功臣表

和蕃公主

高帝罷平城歸是時冒頓單于兵彊控弦四十萬騎數苦北邊上患之以問婁敬敬曰陛下誠能以適長公主妻單于厚奉遺之彼知漢女送厚蠻夷必慕以為閼氏生子必為太子代單于冒頓在固為子婿死外孫為單于豈曾聞外孫敢與大父亢禮哉可毋戰以漸臣也若陛下不能遣長公主而令宗室及後宮詐稱公主彼亦知不肯貴近無益也高帝曰善遣長公主呂后泣曰妾

唯以一太子一女奈何棄之匈奴上竟不能遣長公主
而取家人子爲公主妻單于使敬往結和親約傳 婁敬

孝惠三年以宗室女爲公主嫁匈奴單于本紀

匈奴老上單于初立文帝復遣宗人女翁主爲單于閼

氏使宦者中行說傅翁主匈奴傳

孝景五年遣公主嫁匈奴單于本紀

孝武元封中烏孫昆莫使使獻馬願得尚漢公主爲昆

弟天子問羣臣議許曰必先納聘然後遣女烏孫以馬

千匹聘漢遣江都王建女細君爲公主以妻焉賜乘輿

服御物爲備官屬宦官侍御數百人贈送甚盛昆莫以

爲右夫人昆莫年老欲使其孫尚公主公主不聽上書

言狀天子報從其國俗岑陬遂妻公主生一女少夫公

主死漢復以楚王戊之孫解憂爲公主妻岑陬西域傳

宣帝元康二年烏孫昆彌上書欲以漢外孫元貴靡爲

嗣得令復尚漢公主結婚重親畔絕匈奴願聘馬羸各

千疋上遣使至烏孫先迎取聘昆彌及太子左右大將

軍都尉皆遣使凡三百餘人入漢迎取少主迺以烏孫

生解憂弟子相夫爲公主置官屬侍御百餘人舍上林

西漢會要 卷之五
學烏孫言天子自臨平樂觀會匈奴使者外國君長大
角抵設樂而遣之未出塞間烏孫昆彌翁歸靡死天子

徵還少主

西域傳

先是烏孫昆彌歸靡因長羅侯常惠上書願以漢外孫
元貴靡爲嗣得復尚少主結婚內附畔去匈奴詔下公
卿議望之以爲烏孫絕域信其美言萬里結婚非長策
也天子不聽神爵二年遣長羅侯惠使送公主配元貴
靡未出塞翁歸靡死其兄子狂王肯約自立惠從塞下
上書願留少主敦煌郡惠至烏孫責以負約因立元貴

靡還迎少主詔下公卿議望之復以爲不可烏孫持兩
端亡堅約其效可見前少主在烏孫四十餘年恩愛不
親密邊境未以安此已事之驗也今少主以元貴靡不
得立而還信無負於四夷此中國之大福也少主不止
繇役將興其原起此天子從其議召少主還後烏孫雖
分國兩立以元貴靡爲大昆彌漢遂不復與結婚蕭望之傳
甘露三年楚公主上書言年老土思願得歸骸骨葬漢
地天子聞而迎之公主與烏孫男女三人俱來至京師
時年且七十賜田宅奴婢奉養甚厚朝見儀比公主西域

傳

元帝竟寧元年匈奴呼韓邪單于復入朝自言願婿漢氏以自親帝以後宮良家子王嬙字昭君賜單于單于驩喜王昭君號寧胡閼氏生一男呼韓邪死株絜單于復妻王昭君生二女長女為須卜居次小女為當于居次

居次者女之號若漢言公主也見匈奴傳

內職雜錄

漢興因秦之稱號妾皆稱夫人又有美人良人八子七子長使少使之號焉至武帝制婕妤倓娥俗華充依各

有爵位而元帝加昭儀之號凡十四等云

昭儀位視丞相爵比諸侯王

倓仔視上卿比列侯

姪娥視中二千石比關內侯

俗華視真二千石比大上造

美人視二千石比少上造

八子視千石比中更

充依視千石比左更

七子視八百石比右庶長

良人視八百石比左庶長

良使視六百石比五大夫

少使視四百石比公乘

五官視三百石

順常視二百石

無涓共和娛靈保林良使夜者皆視百石以上凡十四等

上家人子中家人子視有秩斗食並外戚傳

諸姬諸姬見高五世傳又文紀薄姬注如淳曰姬衆妾之忽稱漢官儀曰姬妾數百外戚傳亦曰幸姬戚

夫人帥古曰姬本周之姓貴於衆國之女所以婦人美號皆稱姬焉史記云高祖居山東時多美姬是也

長御長御太子傳長御倚華趙皇后傳官長李南漢官考云長御即宮長也

材人翼奉傳未央建章甘泉材人名曰百數藝文志未央材人師古曰材人天子內官

待詔掖庭元帝賜單于待詔掖庭王嬙為關氏應劭曰郡國獻女未御見須命於掖庭故曰待詔

中宮史

學事史並趙皇后傳中宮史學事史曹宮

太子有妃有良娣有孺子凡三等外戚傳

太子中人李敢女為太子中人

皇孫妻稱夫人史皇孫子夫人

皇孫妾無位號皆稱家人子外戚傳

內職雜錄

元帝既重傅婕妤及馮婕妤亦幸生中山孝王上欲殊之於後宮以二人皆有子爲王上尙在未得稱太后乃更號曰昭儀賜以印綬有婕妤上昭其儀尊之也至成哀時趙昭儀董昭儀皆無子猶稱焉

傅昭儀傳

傅昭儀及子定陶王愛幸寵於皇后太子匡衡上疏曰臣聞室家之道修則天下之理得故詩始國風禮本冠婚始乎國風原情性而明人倫也本乎冠婚正基兆而防未然也福之興莫不本乎室家道之衰莫不始乎梱

內故聖王必謹妃后之際別適長之位禮之於內也卑不踰尊新不先故所以統人情而理陰氣也其尊適而卑庶也適子冠乎祚禮之用醴衆子不得與列所以貴正體而明嫌疑也非虛加其禮文而已乃中心與之殊異故禮探其情而見之外也聖人動靜游燕所親物得其序得其序則海內自修百姓從化如當親者疏當尊者卑則佞巧之姦因時而動以亂國家故聖人謹防其端禁於未然不以私恩害公義陛下聖德純備莫不修正則天下無爲而治詩云予以四方克定厥家傳曰正

家而天下定矣

匡衡傳

孝成趙皇后既立後寵少衰而弟絕幸爲昭儀居昭陽舍其中庭彤朱而殿上髹漆切皆銅沓冒黃金塗白玉階壁帶往往爲黃金缸函藍田璧明珠翠羽飾之自後宮未嘗有焉

趙后傳

建始三年冬日食地震同日俱發詔舉方正直言極諫之士谷永對曰明王卽位正五事建大中以承天心則庶徵序於下日月理於上如人君淫溺後宮般樂游田五事失於躬大中之道不立則咎徵降而六極至凡災

異之發各象過失以類告人乃十二月朔日食婺女之分地震蕭牆之內二者同日俱發以丁寧陛下厥咎不遠宜厚求諸身意豈陛下志在閨門內寵太盛女不遵道嫉妬專上妨繼嗣歟古之王者廢五事之中失夫婦之紀妻妾得意謁行於內執行於外至覆傾國家或亂陰陽昔褒姒用國宗周以喪閭妻驕扇日以不臧此其效也夫妻之際王事綱紀安危之機聖王所致慎也昔舜飭止二女以崇至德楚莊忍絕丹姬以成伯功幽王惑於褒姒周德降亡魯桓脅於齊女社稷以傾誠修後

宮之政明尊卑之序貴者不得嫉妬專寵以絕驕嫚之
 端抑褒閹之亂賤者咸得秩進各得厥職以廣繼嗣之
 統息白華之怨後宮親屬饒之以財勿與政事以遠皇
 父之類損妻黨之權未有閨門治而天下亂者也谷永傳
 其夏復令方正對策永對曰日食地震皇后貴妾專寵
 所致陛下誠深察愚臣之言平天覆之施使列妾得人
 人且進猶尚未足也急復益納官子婦人毋擇好醜毋
 避尊字母論年齒推法言之陛下得繼嗣於微賤之間
 乃反為福得繼嗣而已毋非有賤也後宮女史使令有

直意者廣求於微賤之間以遇天所開右尉釋皇太后

之憂溫解謝上帝之譴怒則繼嗣蕃滋災異訖息谷永傳

杜欽對策曰日以戊申蝕時加未戌未土也土者中宮

之部其夜地震未央宮殿中此必適妾將有爭寵相害

而為患者唯陛下深戒之正后妾抑女寵防奢泰去佚

游如此即堯舜不足與比隆咎異何足消滅杜欽傳

哀帝召董賢女弟以為昭儀位次皇后更名其舍為椒

風以配椒房云董賢傳

五官以下葬司馬門外外戚傳

出宮人

呂太后時出宮人以賜諸王各五人寶皇后傳

孝文十二年出孝惠皇帝後宮美人令得嫁本紀

後七年遺詔歸夫人以下及少使本紀

孝景後三年遺詔出宮人歸其家復終身本紀

元帝初即位年歲不登諫大夫貢禹奏言古者宮女不

過九人高祖孝文孝景皇帝循古節儉宮女不過十餘

後世爭為奢侈轉益甚武帝時又多取好女至數千

人以填後宮及弃天下昭帝幼弱霍光專事皆以後宮

女置於園陵大失禮逆天心昭帝晏駕光復行之至孝

宣皇帝時陛下惡有所言羣臣亦隨故事甚可痛也故

使天下承化取女皆大過度諸侯妻妾或至數百人豪

富吏民蓄歌者至數十人是以內多怨女外多曠夫皆

在大臣循故事之辜也唯陛下審察後宮擇其賢者留

二十人餘悉歸之及諸陵園女亡子者宜悉遣獨杜陵

宮人數百誠可哀憐也天子納善其忠本傳

成帝永始四年出杜陵諸未嘗御者歸家本紀張晏曰宮人無子乃

守園 陵也 昭始歸與宮人年二十以下出者乃

哀帝即位掖庭宮人年三十以下出嫁之

紀本

平帝崩太后詔出媵妾皆歸家得嫁如孝文時故事

紀本

宮人媵掖庭宮人年三十以下出嫁之
二十人媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之
媵掖庭宮人之媵掖庭宮人年三十以下出嫁之

西漢會要卷七

宋 徐 天 麟 撰

禮一 吉 禮

禮

秦兼天下燔詩書殺術士六學從此缺矣陳涉之王也
魯諸儒持孔氏禮器往歸之於是孔甲為涉博士卒與
俱死陳涉起匹夫敵適戍以立號不滿歲而滅亡其事
至微淺然而搢紳先生負禮器往委質為臣者何也以
秦禁其業積怨而發憤於陳王也及高皇帝誅項籍司

兵圍魯魯中諸儒尚講誦習禮弦歌之音不絕豈非聖人遺化好學之國哉於是諸儒始得修其經學講習大

射鄉飲之禮儒林序

漢王已并天下諸侯共尊為皇帝於定陶叔孫通就其儀號高帝悉去秦儀法為簡易羣臣飲爭功醉或妄呼拔劍擊柱上患之通知上益厭之說上曰夫儒者難與進取可與守成臣願召魯諸生與臣弟子共起朝儀高帝曰得無難乎通曰五帝異樂三王不同禮禮者因時世人情為之節文者也故夏殷周禮所因損益可知者

謂不相復也臣願頗采古禮與秦儀雜就之上曰可試為之令易知度吾所能行為之於是通使召魯諸生三十餘人魯有兩生不肯行曰今天下初定死者未葬傷者未起又欲起禮樂禮樂所由起百年積德而後可興也吾不忍為公所為公所為不合古吾不行公往矣毋污我通笑曰若真鄙儒不知時變遂與所召三十人西及上左右為學者與其弟子百餘人為縣葺野外如淳曰謂以茅剪樹地為纂位尊卑之次也習之月餘通曰上可試觀上行禮曰吾能為此迺令羣臣習肄會十月漢七年長樂宮成

諸侯羣臣朝十月儀先平明謁者治禮引以次入殿門

廷中陳車騎戍卒衛官設兵張旗志志與傳曰趨殿下

郎中俠陛階數百人功臣列侯諸將軍軍吏以次陳西

方東鄉文官丞相以下陳東方西鄉大行設九賓臚句

傳蘇林曰上傳語告下為臚下告上為句也韋昭曰大

行掌賓客之禮今之鴻臚也九賓則周禮九儀也謂

公侯伯子男孤於是皇帝輦出房百官執戟傳警戟史

卿大夫士也職引諸侯王以下至吏六百石以次奉賀自諸侯王以

下莫不震恐肅敬至禮畢盡伏置法酒師古曰法酒酒

之至醉諸侍坐殿上皆伏抑首以尊卑次起上壽觴九行

謁者言罷酒御史執法舉不如儀者輒引去竟朝置酒

無敢謹譁失禮者於是高帝曰吾迺今日知為皇帝之

貴也拜通為奉常賜金五百斤九年高帝徙通為太子

太傅孝惠卽位迺謂通曰先帝園陵寢廟羣臣莫習徙

通為奉常師古曰又定宗廟儀法及稍定漢諸儀法皆

通所論著也叔孫

文帝時賈誼以為漢興至今二十餘年宜定制制度興禮

樂然後諸侯軌道百姓素樸獄訟衰息迺草具其儀天

子說焉而大臣絳灌之屬害之故其儀遂寢禮樂

賈誼言今民賣僮者爲之繡衣絲履備諸緣內之閑中
是古天子后服所以廟而不宴者也而庶人得以衣婢
妾白纈之表薄紈之裏縑以備諸美者黼繡是古天子
之服今富人大賈嘉會召客者以被牆古者以奉一帝
一后而節適今庶人屋壁得爲帝服倡優下賤得爲后
飾然而天下不屈者殆未有也且帝之身自衣卓錫而
富民牆屋被文繡天子之后以緣其領庶人夔妾緣其
履此臣所謂舛也夫百人作之不能衣一人欲天下亡
寒胡可得也一人耕之十人聚而食之欲天下亡飢不

可得也飢寒切於民之肌膚欲其亡爲姦邪不可得也
國已削矣盜賊直須時耳然而獻計者曰毋動爲大耳
夫俗至大不敬也至亡等也至冒上也進計者猶曰毋
爲可爲長太息者此也商君遺禮義棄仁恩并心於進
取行之二歲秦俗日敗故秦人家富子壯則出分家貧
子壯則出贅借父耰鉏慮有德色母取箕帚立而諄語
抱哺其子與公併倨婦姑不相說則反脣而相稽其慈
子耆利不同禽獸者亡幾耳然并心而赴時猶曰蹶六
國兼天下功成求得矣終不知反廉愧之節仁義之厚

信并兼之法遂進取之業天下大敗衆掩寡智欺愚勇
威怯壯陵衰其亂至矣是以大賢起之威震海內德從
天下曩之爲秦者今轉而爲漢矣然其遺風餘俗猶尚
未改今世以侈靡相競而上亡制度棄禮誼捐廉恥日
甚可謂月異而歲不同矣逐利不耳慮非顧行也今其
甚者殺父兄矣盜者剽寢戶之簾塞兩廟之器白晝大
都之中剽吏而奪之金矯僞者出幾十萬石粟賦六百
餘萬錢乘傳而行郡國此其亡行義之尤至者也而大
臣特以簿書不報期會之間以爲大故至於俗流失世

壞敗因恬而不知怪慮不動於耳目以爲是適然耳夫
移風易俗使天下回心而鄉道類非俗吏之所能爲也
俗吏之所務在於刀筆筐篋而不知大體陛下又不自
憂竊爲陛下惜之夫立君臣等上下使父子有禮六親
有紀此非天之所爲人之所設也夫人之所設不爲不
立不植則僵不修則壞筦子曰禮義廉恥是謂四維四
維不張國乃滅亡使筦子愚人也則可筦子而少知治
體則是豈可不爲寒心哉秦滅四維而不張故君臣乖
亂六親殃戮姦人並起萬民離叛凡十三歲而社稷爲

西漢會要卷七
墟今四維猶未備也故姦人幾幸而衆心疑惑豈如今
定經制令君君臣臣上下有差父子六親各得其宜姦
人亡所幾幸而羣臣衆信上不疑惑此業壹定世世常
安而後有所持循矣若夫經制不定是猶度江河而維
楫中流而遇風波船必覆矣可爲長太息者此也夫禮
者禁於將然之前而法者禁於已然之後是故法之所
用易見而禮之所爲生難知也曰禮云禮云者貴絕惡
於未萌而起教於微眇使民日遷善遠暴而不自知也

賈誼傳

武帝卽位進用英雋議立明堂制禮服以興太平會竇
太后好黃老言不說儒術其事又廢後董仲舒對策言
漢得天下以來常欲善治而至今不能勝殘去殺者失
之當更化而不更化也更化則可善治而災害日去禍
祿日來矣時上方征討四夷不暇留意禮文之事禮樂志
元朔五年夏六月詔曰蓋聞導民以禮風之以樂今禮
壞樂崩朕甚閔焉故詳延天下方聞之士咸薦諸朝其
令禮官勸學講義洽聞舉遺興禮以爲天下先太常其
議予博士弟子崇鄉黨之化以厲賢材焉本紀

漢承百王之弊高祖撥亂反正文景務在養民至于稽古禮文之事猶多闕焉孝武初立卓然罷黜百家表章六經遂疇浴海內舉其俊茂與之立功興大學修郊祀改正朔定歷數協音律作詩樂建封禪禮百神紹周後號令文章煥焉可述後嗣得遵洪業而有三代之風如武帝之雄材大略不改文景之恭儉以濟斯民雖詩書所稱何有加焉武帝贊

宣帝時琅邪王吉爲諫大夫上疏言欲治之主不世出公卿幸得遭遇其時未有建萬世之長策舉明主於三

代之隆者也其務在於簿書斷獄聽訟而已此非太平之基也今俗吏所以牧民者非有禮義科指可世世通行者也以意穿鑿各取一切是以詐僞萌生刑罰無極質樸日消恩愛寢薄孔子曰安上治民莫善於禮非空言也願與大臣延及儒生述舊禮明王制驅一世之民躋之仁壽之域則俗何以不若成康壽何以不若高宗上不納其言吉以病去至成帝時犍爲郡於水濱得古磬十六枚議者以爲諧祥劉向因是說上宜興辟雍設庠序陳禮樂隆雅頌之聲盛揖讓之容以風化天下如

此而不治者未之有也或曰不能具禮禮以養人爲本
如有過差是過而養人也刑罰之過或至死傷今之刑
非臯陶之法也而有司請定法削則削筆則筆救時務
也至於禮樂則曰不敢是敢於殺人不敢於養人也爲
其俎豆筦弦之間小不備因是絕而不爲是去小不備
而就大不備惑莫甚焉夫教化之比於刑法刑法輕是
舍所重而急所輕也且教化所恃以爲治也刑法所以
助治也今廢所恃而獨立其所助非所以致太平也自
京師有諄逆不順之子孫至於陷大辟受刑戮者不絕

繇不習五常之道也夫承千歲之衰周繼暴秦之餘敝
民漸漬惡俗貪饕險詖不閑義理不示以大化而獨毆
以刑罰終已不改故曰導之禮樂而民和睦初叔孫通
將制定禮儀見非於齊魯之士然卒爲漢儒宗業垂後
嗣斯成法也成帝以向言下公卿議會向病卒丞相大
司空奏請立辟廱案行長安城南營表未作遭成帝崩
羣臣引以定謚及王莽爲宰衡欲耀衆庶遂興辟廱因
以篡位海內畔之世祖受命中興撥亂反正改定京師
于土中即位三十年四夷賓服百姓家給政教清明迺

營立明堂辟廡顯宗卽位躬行其禮宗祀光武皇帝于
明堂養三老五更於辟廡威儀旣盛美矣然德化未流
洽者禮樂未具羣下無所誦說而庠序尚未設之故也
孔子曰辟如爲山未成一匱止吾止也今叔孫通所撰
禮儀與律令同錄藏於理官法家又復不傳漢典寢而
不著民臣莫有言者又通沒之後河間獻王采禮樂古
事稍稍增輯至五百餘篇今學者不能昭見但推士禮
以及天子說義又頗謬異故君臣長幼交接之道寢以

不章

禮樂志

司徒掾班彪曰漢承亡秦絕學之後祖宗之制因時施
宜曰元成後學者蕃滋貢禹毀宗廟匡衡改郊兆何武
定二公後皆數復故紛紛不定何者禮文缺微古今異
制各爲一家未可偏定也

韋元成贊

西漢會要

卷一

九

--	--	--	--	--	--	--	--	--	--

國

